

AOB

[SINESTEN DUT GIZONA]

Sinesten dut gizona
zerbait handia dela,
 gauzen
gozamendari dela;
 dena,
izartegi eta lur,
 gizonarentzat
sortuak direla.

Sinesten dut gizona
gauzen mugak mugatzen
 duela
neurri batetan;
 baina
gauzen gain jartzeko ere
ahalmenik baduela gizonak
aitortzen dut.

Sinesten dut gizona
gauzen eta ametsen
arteko giltzaren
jabe ta jaun dela;
eta gauza dela
materiaz kanpoko
izpiritu den mundu
arlotsuan sartzeko.

Sinesten dut gizona
bere eskuko dela
zaituta dagoela
haren ardura duen baten
ardurape zihurretan [*sic*],
diren guztien eguzki
gorenaren sistemako
 ilargi
hil eta argi
biziena bezala.